

## 25.novembar – Dan državnosti Bosne i Hercegovine

... Ima jedna zemlja – topline i mirisa puna, vjetrovi joj kosu češljaju i mrse, rijeke joj priču čuvaju i kroje, duga joj prosipa čarobne boje.

Ima zemlja jedna, ljubavi puna i dobrotom iskri;  
Pretaču se sjećanja i plove joj misli, a ona čista, rosna i vječno ponosna Bosna.

Šta joj se sve desilo nije, i ko je sve gazio nije...

... ona ustajala jača; koliko suza primila u se, koliko tuge pritislo joj njedra, a ona radost sipa na sve strane.

To može samo Bosna – jedna i jedina, čuvana srcima naroda bosanskog, naroda jednog jedinstvenog, naroda kojeg jad ne slama, nego čeliči, naroda koji suze u bisere pretvara, naroda što se ne boji prošlosti, ni utvara.

Gaze gazije bosanske, zemljom bosanskom vječnom,  
Gaze i čuvaju dok damari im biju  
i vrela srca tuku  
u okrilje sjećanja k'o u tihu luku  
duša bosanska tone, tone i izranja i cvijeta  
dok čuva svoje  
sa prošlošću spona.

... Koga je sve Bosna iznjedrila, kakve je heroje dala, kakve velikane svijetu poklonila...i još uvijek njedri, daje i poklanja. Niču u Bosni cvjetovi mirisni, niču i mirisom stihove pletu. Nemamo pravo da ne znamo, ne poznajemo, a još manje da



zaboravimo. Ako ih ne znaju drugi, mi ih znati moramo, ako ih zaboravljaju drugi, mi ne smijemo.

Pržile su Bosnu vatre mnoge, jake i silne, gazili je znani i neznani, uspavljivali je jecaji, tuge budile; živjela, proživljavala i preživljavala omotana plaštom tame, potrešena bolom, razdirana vjetrovima mračnim, grcala, posrtala, al' se dala nije. Nikad i nikom. Jer Bosna je to! Ona mrak svijetlom bije, ljubavlju mržnju tjera, dobrotom liječi bijes... nevolje potire, a sjećanja čuva. Toplo srce i široku ruku nudi, otvara staze svima,

Dušom čistom trepti. Jedna, jedina, jedinstvena – Bosna. Bosna i narod bosanski. Narod što zna i za patnju i za radost, i za tamu i za sreću, i za jecaj i za suzu, i za strah i za merak, i za sevdah i za uzdah. I za ogromnu dušu bosansku što je na svijetu nema nit' se naći može.

Sihirbaz je ona, magnet, vrelo života, protkana sjećanjem, vezom od sna, protkana dobrotom, ljepotom, plemenitošću, nadom, vjerom, čistotom...pamti i čuva svoj prošlosti dah...i gazi dalje jača i ljepša, čistija i žešća, ponosnija i vedrija...i naša ....i vječna.

Prije 77 godina, na osnivačkom zasjedanju Zemaljskog antifašističkog vijeća narodnog oslobođenja Bosne i Hercegovine (ZAVNOBIH-a), održanom u Mrkonjić Gradu (Varcar Vakufu) 25. novembra 1943. godine, obnovljeni su teritorijalno jedinstvo Bosne i Hercegovine i njena DRŽAVNOST.

Samo zahvaljujući borcima Armije Bosne i Hercegovine danas smo u



mogućnosti da govorimo o 25. novembru, Danu državnosti Bosne i Hercegovine i milenijskom postojanju.

Danas je važno istaći još jednu činjenicu – Bosnu i Hercegovinu su miru gradili, a u ratu branili njeni patrioti, hrabre bosanske gazije.

Zbog toga je naša generacija veliki dužnik naših slavni predaka i hrabrih savremenika, koji su odbranili bosansku zemlju i narod, odbranili bosansku državnost.

SRETNO DOMOVINO.

Sretno moja Bosno i Hercegovino.

Koristimo ovu priliku da svim iskrenim patriotima čestitamo 25. novembar Dan državnosti Bosne i Hercegovine.



Edina Žugor-Šalaka  
Nermin Imamović

